

父母的教示

我的阿母個性溫純，逐工笑咪咪，拄著人毋管是囡仔抑是大人，攞會親切佻人拍招呼相借問。伊定定共阮講做人愛謙虛，對人愛慈悲，這樣才會乎人呵咗，莫怪大家對阮阿母攞呵咗甲會觸舌，人緣實在有夠讚！啊若講到阮阿爸，我感覺阿爸閣親像啥物代誌攞捌的萬能博士，我佇伊的身上學著真濟代誌，阿爸是一個儉腸 neh 肚的人，伊定定講物件袂使拍損哩，因為一粒米愛百粒汗，一區田規身汗，囡仔人愛會曉勤儉，勤儉才有底。

從細漢的時陣，阿母定定說古乎我聽，嘛教我做人的道理，伊講：「鼓無吹(扑)袂響，人無教袂曉」，即馬我愛閣較認真聽序大人的教訓，後擺大漢才會當做一個有學問、有出脫、人人呵咗的人。

阿爸阿母他們捌真濟道理，對細漢到大，他們的教示我攞記牢牢：

首先、魚吃溪水，人吃嘴美：平常時阿母教阮愛講好話，才會得人緣！伊講心歹沒人知，嘴歹尚利害，閣講：「第一嘴美第二風水」。講話要看，關門要問，叫阮講話愛細膩，好話一句，歹話嘛一句，毋通一枝喙亂使講烏白啼。

第二、好天著愛積雨來糧：阿母講伊讀高中 e 時，有一天放學佻他同學去遛百貨公司，拄著百貨公司開幕熱鬧滾滾，耍了過頭走到火車頭 e 時，火車已經慢慢發動，伊的同學跤手猛掠就跳上車，阿母跟著後壁嘛跳上車，毋過跳了無好勢，阿母煞輾落土跤，好裡佳哉只是輾落月台。從那擺開始

阿母逐項代誌攞會提早，毋駛「人來才掃地，人去才泡茶」伊講「艱苦頭快活尾，平時愛先拍拼認真」，才免時到日到四界總。

第三、愛拼才會贏：阿母講：「做雞就筊，做人就反」，做人愛腳踏實地認真做才有底，讀冊著愛一步一跬印，毋通逐擺靠運氣，做代誌要有心才會成功。

第四、戲棚腳 khia 久就是咱的：阿母鼓勵阮要肯拍拼，伊講「濛濛仔雨，落久嘛會澹」只要肯拍拼，毋驚艱苦，一定會有出頭的一工。乞丐囡仔賴東進先生，伊細漢時陣就跟著他阿爸甲人四界分，但是伊並無因為按呢就放棄希望，伊比別人卡認真，比別人卡拍拼，即馬，伊有成功 e 事業，毋免閣過著彼種艱苦 e 日子。

第五、勤儉才有底：阿爸講「台灣錢淹腳目」只要你認真拍拼，相信一定勤餓死，拍拼 e 人才會出頭，人咧做天咧看，即馬台灣人 e 生活大轉變囉，食 e 是山珍海味，穿 e 是綾羅紡絲，住是樓仔厝，出門是駛賓士，生活過甲真富裕，平常時愛勤儉，搪著時機 bai 的時陣才袂歹過日，會當快活過一世人。

我佇阮是大人身上學著真濟道理，乎我感覺家己愈來愈捌代誌啊！以後毋管我拄到啥物困難、啥物問題，我攞袂驚，因為只要想著阿母佻阿爸 e 鼓勵，我就會勇敢向前走！

我嘛感覺阮真幸福，會當拄著遮呢好的父母，我一定會好好拍拼頭路，

佇社會上做一個有出脫的人，才袂辜負阿母佻阿爸對我的期待。